



官常典第十三卷

宗藩部彙考五

北魏

道武帝皇始元年初封拜宗室仍五等之制 按魏書道武帝本紀皇始元年秋九月戊午初建臺省置百官封公侯將軍刺史太守尚書郎已下悉用文人 按官氏志皇始元年始建曹省備置百官封拜五等

皇始二年封元儀元題皆爲王 按魏書道武帝本紀二年夏五月甲寅以東平公元儀爲驃騎大將軍都督中外諸軍事兼豫雍荆徐揚六州牧左丞相封衛王襄城公元題進封爲王

天興元年進元遵元順爲王詔吏部郎中鄧淵立爵品 按魏書道武帝本紀皇始二年冬十月甲申中山平天興元年春正月置行臺於中山詔左丞相守尚書令衛王儀鎮中山略陽公元遵鎮渤海之合口三月徵左丞相衛王儀還京師詔略陽公遵代鎮中山夏四月壬戌進遵封常山王南安公元順進封毗陵王冬十有一月辛亥詔尚書吏部郎中鄧淵典官制立爵品

天興六年冬封皇子嗣等四人及秦愍陳留二王子皆爲王 按魏書道武帝本紀六年冬十月乙卯立皇子嗣爲齊王加車騎大將軍位相國紹爲清河王加征南大將軍熙爲平陽王曜爲河南王封故秦愍王子夔爲豫章王陳留王子右將軍悅爲朱提王 按明元帝本紀帝諱嗣太祖長子也天興六年封齊王拜相國天賜六年冬十月清河王紹作逆太祖崩帝入誅紹壬申卽皇帝位

天賜元年制爵四等封皇子爲王宗室爲公侯子定郡縣品第之差詔皆置臣吏 按魏書道武帝本紀天賜元年秋九月帝臨昭陽殿分置衆職引朝臣文武親自簡擇量能敘用制爵四等曰王公侯子除伯男之號追錄舊臣加以封爵各有差 按官氏志天賜元年九月減五等之爵始分爲四

曰王公侯子除伯男二號皇子及異姓元功上勳者封王宗室及始蕃王皆降爲公諸公降爲侯侯子亦以此爲差於是封王者十人公者二十二人侯者七十九人子者一百三人王封大郡公封小郡侯封大縣子封小縣王第一品公第二品侯第三品子第四品十二月詔始賜王公侯子國臣吏大郡王二百人次郡王上郡公百人次郡公五十人侯二十五人子十二人皆立典師職比家臣總統羣隸 按文獻通考後魏道武皇始元年始封五等至天賜元年減五等之爵始分爲四曰王

公侯子除伯男之號其後復加伯男焉

天賜四年封諸皇子修等四人爲王常山王遵賜死 按魏書道武帝本紀四年春二月封皇子修爲河間王處文爲長樂王連爲廣平王黎爲京兆王夏五月常山王遵有罪賜死

明元帝永興元年冬十有二月戊戌封衛王儀子良爲南陽王陰平公元烈進爵爲王高涼王樂眞改封平陽王 按魏書明元帝本紀云云

泰常七年封皇子燾等七人爲王 按魏書明元帝本紀泰常七年夏四月甲戌封皇子燾爲泰平王燾字佛釐拜相國加大將軍丕爲樂平王加車騎大將軍彌爲安定王加衛大將軍範爲樂安王加中軍大將軍健爲永昌王加撫軍大將軍崇爲建寧王加輔國大將軍俊爲新興王加鎮軍大將軍 按太武帝本紀帝諱燾太宗明元皇帝之長子也泰常七年四月封泰平王五月爲監國八年十月壬申卽皇帝位

太武帝始光三年夏五月辛卯中山公元纂進爵爲王南安公元素復先爵常山王 按魏書太武帝本紀云云

延和元年以立皇太子詔王公將軍以下普增爵秩 按魏書太武帝本紀延和元年春正月丙午立皇子晃爲皇太子己巳詔曰朕以眇身獲奉宗廟思闡洪基廓清九服遭值季運天下分崩是用屢征罔或寧息自始光至今九年之間戎車十舉羣帥文武荷戈被甲櫛風沐雨蹈履鋒刃與朕均勞賴神祇之助將士宣力用此摧折強豎克翦大憝兵不極武而二寇俱滅師不違律而遐方以寧加以時氣和洽嘉瑞並降遍于郡國不可勝紀豈朕一人獨應此祐斯亦羣后協同之所致也公卿因茲稽諸天人之會請建副貳夫慶賞之行所以褒崇勳舊旌顯賢能以永無疆之休其王公將軍以下普增爵秩啟國承家修廢官舉雋逸蠲除煩苛更定科制務從輕約除故革新以正一統羣司當深思效績直道正身立功立事無或懈怠稱朕意焉

延和三年春閏月己卯彭城公元栗進爵爲王 按魏書太武帝本紀云云

是年閏三月

太延二年冬閏月乙丑潁川王提改封武昌王 按魏書太武帝本紀云云

是年閏十一月

太平眞君元年冬十有二月以河南王曜子羯兒爲河間王後改封略陽王 按魏書太武帝本紀

云云

太平眞君二年春三月庚戌新興王俊略陽王羯兒有罪並黜爲公 按魏書太武帝本紀云云

太平眞君三年封皇子伏羅等五人爲王 按魏書太武帝本紀太平眞君三年冬十月己卯封皇子伏羅爲晉王翰爲秦王譚爲燕王建爲楚王余爲吳王

太平眞君四年詔諸功臣以爵歸第隨時朝請 按魏書太武帝本紀四年冬十有一月甲子詔曰朕承祖宗重光之緒思闡洪基恢隆萬世自經營天下平暴除亂埽清不順二十年矣夫陰陽有往復四時有代謝授子任賢所以休息優隆功臣式圖長久蓋古今不易之令典也其令皇太子副理萬機總統百揆諸朕功臣勤勞日久皆以爵歸第隨時朝請饗宴朕前論道陳謨而已不宜復煩以劇職更進賢俊以備百官主者明爲科制以稱朕心

太平眞君七年秋八月復略陽公羯兒王爵 按魏書太武帝本紀云云

太平眞君十年冬十有二月己酉以平昌公元託眞爲中山王 按魏書太武帝本紀云云

正平元年元旦大會羣臣受爵者二百餘人又封皇孫溶爲王尋以嫡嗣不果封因改建秦燕楚吳四王封國 按魏書太武帝本紀正平元年春正月丙戌朔大會羣臣於江上班賞各有差文武受

爵者二百餘人冬十有二月丁丑封皇孫濬爲高陽王尋以皇孫世嫡不宜在藩乃止封秦王翰爲東平王燕王譚爲臨淮王楚王建爲廣陽王吳王余爲南安王 按文成帝本紀帝諱濬恭宗景穆皇帝之長子也少聰達世祖愛之常置左右號世嫡皇孫正平二年十月戊申卽皇帝位於永安前殿

文成帝興安二年封建寧王崇子麗爲濟南王 按魏書文成帝本紀興安二年春正月辛巳封建寧王崇子麗爲濟南王二月己未司空京兆王杜元寶謀反伏誅建寧王崇崇子濟南王麗爲元寶所引各賜死

太安三年夏五月己巳封皇弟新成爲陽平王 按魏書文成帝本紀云云
太安四年春二月丙子登碣石山觀滄海大饗羣臣於山下班賞進爵各有差 按魏書文成帝本紀云云

太安五年夏四月乙巳封皇弟子推爲京兆王 按魏書文成帝本紀云云

和平二年封皇弟小新成等四人爲王 按魏書文成帝本紀和平二年秋七月戊寅封皇弟小新

成爲濟陰王加征東大將軍鎮平原天賜爲汝陰王加征南大將軍鎮虎牢萬壽爲樂浪王加征北大將軍鎮和龍洛侯爲廣平王

和平四年春三月乙未皇子胡仁薨追封樂陵王 按魏書文成帝本紀云云 按景穆十二王傳

樂陵王胡兒景穆皇帝子和平四年薨追封樂陵諡曰康無子

按本紀作皇子與傳異

和平五年春正月丁亥封皇弟雲爲任城王 按魏書文成帝本紀云云

獻文帝天安元年以元孔雀爲濮陽王詔詐取爵位者削其爵假爵號者子孫不得襲 按魏書獻

文帝本紀天安元年春正月乙亥以侍中元孔雀爲濮陽王秋七月詔諸有詐取爵位罪特原之削

其爵職其有祖父假爵號貨賕以正名者不聽繼襲諸非勞進超遷者亦各還初不以實聞者以大

不敬論

皇興元年冬十月癸卯濮陽王孔雀坐怠慢降爵爲公 按魏書獻文帝本紀云云

皇興二年秋九月辛亥封皇叔楨爲南安王長壽爲城陽王太洛爲章武王休爲安定王 按魏書

獻文帝本紀云云

皇興四年夏五月封皇弟長樂爲建昌王 按魏書獻文帝本紀云云

孝文帝延興元年冬十有二月壬辰復前濮陽王孔雀本封 按魏書孝文帝本紀云云

延興二年封皇叔略爲王詔諸假爵不得世襲 按魏書孝文帝本紀延興二年冬十有一月丁亥

封皇叔略爲廣川王 按官氏志延興二年五月詔曰非功無以受爵非能無以受祿凡出外遷者皆引此奏聞求乞假品在職有效聽下附正若無殊稱隨而削之舊制諸鎮將刺史假五等爵及有所貢獻而得假爵者皆不得世襲

延興五年冬十有二月丙寅建昌王長樂改封安樂王 按魏書孝文帝本紀云云

永明元年目辰及羅拔皆進爵爲王元丕進爵爲正王孔雀有罪賜死 按魏書孝文帝本紀永明

元年夏六月戊寅尙書左僕射南平公目辰爲司徒進封宜都王秋七月甲辰濮陽王孔雀有罪賜死冬十月乙丑進征西大將軍假東陽王元丕爵爲正王辛未濟南公羅拔進爵爲王

太和三年冬十有一月癸丑進假梁郡公元嘉爵爲假王督二將出淮陰 按魏書孝文帝本紀云

云

太和五年夏六月戊午封皇叔簡爲齊郡王猛爲齊安豐王 按魏書孝文帝本紀云云

太和九年制封王者之祿各有差以廣陽王建第二子紹建爲王封諸皇弟禧等六人皆爲王 按魏書孝文帝本紀太和九年春二月己亥制皇子封王者皇孫及曾孫紹封者皇女封者歲祿各有差以廣陽王建第二子嘉紹建後爲廣陽王三月丙申封皇弟禧爲咸陽王幹爲河南王羽爲廣陵王雍爲潁川王勰爲始平王詳爲北海王 按宣武帝本紀景明二年夏五月壬戌咸陽王禧謀反賜死

太和十年夏四月辛酉朔始制五等公服秋八月乙亥給尙書五等品爵已上朱衣玉珮大小組綬 按魏書孝文帝本紀云云

太和十三年春三月甲子夏州刺史章武王彬以貪賕削封夏六月汝陰王天賜南安王楨並坐贓賄免爲庶人 按魏書孝文帝本紀云云

太和十四年冬十月庚辰京兆王太興有罪免官削爵 按魏書孝文帝本紀云云

太和十六年降諸王公侯爵一等 按魏書孝文帝本紀十有六年春正月乙丑制諸遠屬非太祖

子孫及異姓爲王者皆降爲公公爲侯侯爲伯子男仍舊皆除將軍之號

太和十八年徙建河南潁川二王封國定五等開國食邑者歲祿之差 按魏書孝文帝本紀十有八年春二月丙申河南王幹徙封趙郡潁川王雍徙封高陽冬十有二月己酉詔王公侯伯子男開國食邑者王食半公三分食一侯伯四分食一子男五分食一

太和十九年夏五月己巳城陽王鸞赭陽失利降爲定襄縣王冬十有二月辛酉前南安王楨復本封 按魏書孝文帝本紀云云

太和二十年改建始平王勰封國復封城陽汝陰二王而以太興爲西河王樂陵王思譽以坐事削爵 按魏書孝文帝本紀二十年春正月丁卯詔改姓爲元氏壬辰改封始平王勰爲彭城王以定襄縣王鸞復封城陽王冬十有一月乙酉復封前汝陰王天賜孫景和爲汝陰王前京兆王太興爲西河王十有二月戊辰恆州刺史穆泰等在州謀反遣行吏部尙書任城王澄案治之樂陵王思譽坐知泰陰謀不告削爵爲庶人

太和二十一年封皇子愉等三人爲王以齊郡王子琛爲河間王若後 按魏書孝文帝本紀二十

有一年秋八月壬戌立皇子愉爲京兆王懌爲清河王懷爲廣平王冬十有二月戊戌以齊郡王子琛紹河間王若後 按宣武帝本紀永平元年秋八月癸亥冀州刺史京兆王愉據州反乙丑假尙書李平鎮北將軍行冀州事以討之九月癸卯李平克信都元愉北走統軍叔孫頭執送信都羣臣請誅愉帝弗許詔送京師 按孝明帝本紀正光元年秋七月丙子侍中元乂劉騰殺太傅領太尉清河王懌總攝禁兵

太和二十三年復樂陵王思譽本封復定王及五等封爵職次爲五品 按魏書孝文帝本紀二十有三年春二月癸亥復樂陵王思譽本封 按官氏志太和二十三年高祖復次職令及帝崩世宗初班行之以爲永制王第一品開國縣公散公從第一品開國縣侯第二品散侯從第二品開國縣伯第三品散伯從第三品開國縣子第四品散子從第四品開國縣男第五品歸義侯率義侯順義侯朝服侯散男從第五品前世職次皆無從品魏氏始置之亦一代之別制也

宣武帝景明四年夏六月壬午朔封皇弟悅爲汝南王 按魏書宣武帝本紀云云

正始元年夏五月丁未朔太傅北海王詳以罪廢爲庶人秋八月丁酉封元英爲中山王 按魏書

宣武帝本紀云云

正始三年春三月己卯樂浪王長命坐殺人賜死國除 按魏書宣武帝本紀云云

正始四年秋八月己亥中山王英坐鍾離敗退除名爲民 按魏書宣武帝本紀云云

永平元年秋九月丙戌復前中山王英本封冬十月丁巳詔復故北海王詳本封葬以王禮 按魏

書宣武帝本紀云云

永平二年封故北海王子顥爲北海王又詔定同姓五等班爵出身之敘 按魏書宣武帝本紀永

平二年秋九月辛巳封故北海王子顥爲北海王冬十有二月詔曰五等諸侯比無選式其同姓者
出身公正六下侯從六上伯從六下子正七上男正七下可依此敘之

永平三年冬十有二月辛巳江陽王繼坐事除名 按魏書宣武帝本紀云云

延昌四年春正月丁巳孝明帝卽位秋八月壬辰復前江陽王繼本國以濟南王彧復先封爲臨淮

王 按魏書孝明帝本紀云云

孝明帝熙平二年春二月丁未封御史中尉元匡爲東平王夏四月乙卯安定王超改封北平王

按魏書孝明帝本紀云云

神龜元年夏四月甲辰江陽王繼改封京兆王 按魏書孝明帝本紀云云

神龜二年秋八月己未御史中尉東平王匡坐事削除官爵 按魏書孝明帝本紀云云

正光四年追復咸陽王禧等三人王爵並改建其國尋復范陽王懌仍爲清河王河間王琛章武王融北海王顥俱以貪汙削爵 按魏書孝明帝本紀正光四年春二月壬申追復故咸陽王禧爲數城王京兆王愉爲臨洮王清河王懌爲范陽王以禮加葬丁丑河間王琛章武王融並以貪汙削爵秋八月癸未追復故范陽王懌爲清河王冬十有二月徐州刺史北海王顥坐貪汙削除官爵

正光五年臨淮王彧削爵尋復並復河間王琛北海王顥章武王融官爵 按魏書孝明帝本紀五年春三月沃野鎮人破落汗拔陵聚衆反詔臨淮王彧爲鎮軍將軍假征北將軍都督北征諸軍事以討之夏五月臨淮王彧敗於五原削除官爵秋七月戊午復河間王琛臨淮王彧本封六月秦州城人莫折太提據城反自稱秦王太提尋死子念生代立僭稱天子號年天建置百官秋九月壬申詔復撫軍將軍北海王顥官爵爲都督並率諸將西討冬十有二月壬辰汾州正平平陽山胡叛逆

詔復征東將軍章武王融封爵爲大都督率衆討之

孝昌元年春二月詔復樂浪王長命本爵以其子忠紹之 按魏書孝明帝本紀云云

孝昌二年追復中山王熙本爵子叔仁紹之封元略義陽王尋改東平復京兆王繼本封江陽王進封廣川公邵武城公子攸皆爲王 按魏書孝明帝本紀正光元年秋八月甲寅相州刺史中山王熙舉兵欲誅侍中元乂劉騰不果見殺孝昌二年春三月庚子追復中山王熙本爵子叔仁紹之夏五月丁未前給事黃門侍郎元略自蕭衍還朝封義陽王六月丙子義陽王略改封東平王戊寅詔復京兆王繼本封江陽王秋八月丙子進封廣川縣公元邵爲常山王戊子進散騎常侍御史中尉武城縣開國公子攸爲長樂王 按孝莊帝本紀帝諱子攸彭城王勰之第三子肅宗初以勰有魯陽翼衛之勳封武城縣開國公孝昌二年八月進封長樂王武泰元年春二月肅宗崩帝卽位

孝昌三年春二月丁未追復故東平王匡爵改封濟南王 按魏書孝明帝本紀云云

武泰元年太后以臨洮世子釗踐阼詔亡官失爵聽復封位 按魏書孝明帝本紀武泰元年春正月乙丑皇女生秘言皇子二月癸丑帝崩甲寅皇子卽位皇太后詔曰皇家握歷受圖年將二百祖

宗累聖社稷載安高祖以文思先天世宗以下武經世股肱惟良元首穆穆及大行在御重以寬仁奉養率由溫明恭順朕以寡昧親臨萬國識謝塗山德慚文母屬妖逆遞興四郊多故實望穹靈降祐麟趾衆繁自潘充華有孕椒宮冀誕儲兩而熊羆無兆維虺遂彰于時直以國步未康假稱統嗣欲以底定物情係仰宸極何圖一旦弓劍莫追國道中微大行絕祀皇曾孫故臨洮王寶暉世子釗體自高祖天表卓異大行平日養愛特深義齊君子事符當璧及翌日弗愈大漸彌留乃延入青蒲受命玉几暨陳衣在庭登策靡及允膺大寶卽日踐阼朕是用惶懼忸怩心焉靡洎今喪君有君宗祏惟固宜崇賞卿士爰及百辟凡厥在位並加陟敘內外百官文武督將征人遭艱解府普加軍功二階其禁衛武官直閣以下直從以上及主帥可軍功三階其亡官失爵聽復封位謀反大逆削除者不在斯限清議禁錮亦悉蠲除若二品以上不能自受者任授兄弟可班宣遠邇咸使聞知

孝莊帝永安元年大封同姓諸王並追復故爵按魏書孝莊帝本紀永安元年春二月肅宗崩大都督尨朱榮將向京師謀欲廢立以帝家有忠勳且兼民望陰與帝通榮乃率衆來赴夏四月丙申帝與兄弟夜北渡河丁酉會榮於河陽戊戌南濟河卽帝位以兄彭城王劭爲無上王弟霸城公子

正爲始平王以榮爲使持節侍中都督中外諸軍事大將軍尙書令領軍將軍領左右封太原王己亥百寮相率有司奉璽紱備法駕奉迎於河梁庚子車駕巡河西至陶渚榮以兵權在己遂有異志乃害靈太后及幼主次害無上王劭始平王子正又害丞相高陽王雍司空公元欽儀同三司元恆芝儀同三司東平王略廣平王悌常山王邵北平王超任城王彝趙郡王敏中山王叔仁齊郡王溫公卿已下二千餘人列騎衛帝遷於便幕旣而榮悔稽顙謝罪辛丑車駕入宮御太極殿詔改武泰爲建義元年壬寅太原王尒朱榮上表請追諡無上王爲皇帝詔從之癸卯以安南將軍并州刺史元天穆爲太尉公封上黨王中軍將軍殿中尙書元謨爲儀同三司尙書左僕射封魏郡王中軍將軍給事黃門侍郎元瑱爲東海王甲辰追復故廣陽王淵故安樂王瑩爵通直散騎常侍敷城王坦爲咸陽王諫議大夫元貴平爲東萊王直閣將軍元顥爲魯郡王秘書郎中元暉爲長廣王以北平王超還復爲安定王是月汝南王悅北海王顥臨淮王彧前後奔蕭衍六月丁亥朔追封兄眞定縣開國公子直爲陳留王秋七月臨淮王彧自江南還朝九月己巳以征東將軍齊州刺史元欣爲沛郡王乙亥以平葛榮大赦天下改爲永安元年冬十有一月戊午以無上王世子韶爲彭城王陳留